

四庫全書

經部

欽定四庫全書

周官新義卷六

宋 王安石 撰

地官一

惟王建國辨方正位體國經野設官分職以爲民極乃
立地官司徒使帥其屬而掌邦教以佐王安擾邦國教
官之屬大司徒卿一人小司徒中大夫二人鄉師下大
夫四人上士八人中士十有六人旅下士三十有二人
府六人史十有二人胥十有二人徒百有二十人

鄉老二鄉則公一人鄉大夫每鄉卿一人州長每州中大夫一人黨正每黨下大夫一人族師每族上士一人閭胥每閭中士一人比長五家下士一人

封人中士四人下士八人府二人史四人胥六人徒六十人

鼓人中士六人府二人史四人徒二十人

舞師下士二人胥四人舞徒四十人

牧人下士六人府一人史二人徒六十人

牛人中士二人下士四人府二人史四人胥二十人徒二百人

充人下士二人史二人胥四人徒四十人

載師上士二人中士四人府二人史四人胥六人徒六十人

閭師中士二人史二人徒二十人

縣師上士二人中士四人府二人史四人胥八人徒八十人

遺人中士二人下士四人府二人史四人胥四人徒四
十人

均人中士二人下士四人府二人史四人胥四人徒四
十人

師氏中大夫一人上士二人府二人史二人胥十有二
人徒百有二十人

保氏下大夫一人中士二人府二人史二人胥六人徒
六十人

司諫中士二人史二人徒二十人

司救中士二人史二人徒二十人

調人下士二人史二人徒十人

媒氏下士二人史二人徒十人

司市下大夫二人上士四人中士八人下士十有六人
府四人史八人胥十有二人徒百有二十人

質人中士二人下士四人府二人史四人胥二人徒二十人

廛人中士二人下士四人府二人史四人胥二人徒二十人

胥師二十肆則一人皆二史賈師二十肆則一人皆二史司鬴十肆則一人司稽五肆則一人胥二肆則一人肆長每肆則一人

泉府上士四人中士八人下士十有六人府四人史八人賈八人徒八十人

司門下大夫二人上士四人中士八人下士十有六人

府二人史四人胥四人徒四十人每門下士三人府一人史二人徒四人

司關上士二人中士四人府二人史四人胥八人徒八十人每關下士二人府一人史二人徒四人

掌節上士二人中士四人府二人史四人胥二人徒二十人

遂人中大夫二人遂師下大夫四人上士八人中士十有六人旅下士三十有二人府四人史十有二人胥十

有二人徒百有二十人

遂大夫每遂中大夫一人縣正每縣下大夫一人鄙師
每鄙上士一人鄴長每鄴中士一人里宰每里下士一
人鄰長五家則一人

旅師中士四人下士八人府二人史四人胥八人徒八
十人

稍人下士四人史二人徒十有二人

委人中士二人下士四人府二人史四人徒四十人

土均上士二人中士四人下士八人府二人史四人胥
四人徒四十人

草人下士四人史二人徒十有二人

稻人上士二人中士四人下士八人府二人史四人胥
十人徒百人

土訓中士二人下士四人史二人徒八人

誦訓中士二人下士四人史二人徒八人

山虞每大山中士四人下士八人府二人史四人胥八

人徒八十人中山下士六人史二人胥六人徒六十人
小山下士二人史一人徒二十人

林衡每大林麓下士十有二人史四人胥十有二人徒
百有二十人中林麓如中山之虞小林麓如小山之虞
川衡每大川下士十有二人史四人胥十有二人徒百
有二十人中川下士六人史二人胥六人徒六十人小
川下士二人史一人徒二十人

澤虞每大澤大藪中士四人下士八人府二人史四人

胥八人徒八十人中澤中藪如中川之衡小澤小藪如
小川之衡

迹人中士四人下士八人史二人徒四十人

圻人中士二人下士四人府二人史二人胥四人徒四
十人

角人下士二人府一人徒八人

羽人下士二人府一人徒八人

掌葛下士二人府一人史一人胥二人徒二十人

掌染草下士二人府一人史二人徒八人

掌炭下士二人史二人徒二十人

掌茶下士二人府一人史一人徒二十人

掌蜃下士二人府一人史一人徒八人

園人中士四人下士八人府二人胥八人徒八十人

場人每場下士二人府一人史一人徒二十人

廩人下大夫二人上士四人中士八人下士十有六人

府八人史十有六人胥三十人徒三百人

舍人上士二人中士四人府二人史四人胥四人徒四十人

倉人中士四人下士八人府二人史四人胥四人徒四十人

司祿中士四人下士八人府二人史四人徒四十人
司稼下士八人史四人徒四十人

春人奄二人女春枕二人奚五人

饔人奄二人女饔八人奚四十人

彙人奄八人女彙每奄二人奚五人

大司徒之職掌建邦之土地之圖與其人民之數以佐

王安擾邦國

掌土地之圖則土會土宜土均之法可施王國之地
中可求邦國之地域可制掌人民之數則地守地職
地貢之事可令萬民之卒伍可會都鄙之室數可制
夫然後可以佐王安擾邦國

以天下土地之圖周知九州之地域廣輪之數辨其山

林川澤丘陵墳衍原隰之名物而辨其邦國都鄙之數
制其畿疆而溝封之設其社稷之壇而樹之田主各以
其野之所宜木遂以名其社與其野

各以其野所宜木則新阡欲有所植不謀而知其土
壤所宜公上欲有所斂不視而見其木所出

以土會之灋辨五地之物生一曰山林其動物宜毛物
其植物宜皐物其民毛而方二曰川澤其動物宜鱗物
其植物宜膏物其民黑而津三曰丘陵其動物宜羽物

其植物宜覈物其民專而長四曰墳衍其動物宜介物
其植物宜莢物其民哲而瘠五曰原隰其動物宜羸物
其植物宜叢物其民豐肉而庠

鄭氏以虎豹之屬爲羸物正所謂毛物羸物宜謂鼯
蟪之屬然鄭氏所說出於考工不知考工所記何據
而然

因此五物者民之常而施十有二教焉一曰以祀禮教
敬則民不苟二曰以陽禮教讓則民不爭三曰以陰禮

教親則民不怨四曰以樂禮教和則民不乖五曰以儀
辨等則民不越六曰以俗教安則民不愉七曰以刑教
中則民不兢八曰以誓教恤則民不怠九曰以度教節
則民知足十曰以世事教能則民不失職十有一曰以
賢制爵則民慎德十有二曰以庸制祿則民興功
以土宜之灋辨十有二土之名物以相民宅而知其利
害以阜人民以蕃鳥獸以毓草木以任土事

名以命其土即丘陵墳衍原隰之屬

辨十有二壤而知其種以教稼穡樹藝以土均之灋辨
五物九等制天下之地征以作民職以令地貢以歛財
賦以均齊天下之政

民職地貢財賦則有政矣然遠近多寡之不均先後
緩急之不齊非政之善於是乎以均齊天下之政

以土圭之灋測土深正日景以求地中日南則景短多
暑日北則景長多寒日東則景夕多風日西則景朝多
陰日至之景尺有五寸謂之地中天地之所合也四時

之所交也風雨之所會也陰陽之所和也然則百物阜安乃建王國焉制其畿方千里而封樹之

凡建邦國以土圭土其地而制其域諸公之地封疆方五百里其食者半諸侯之地封疆方四百里其食者參之一諸伯之地封疆方三百里其食者參之一諸子之地封疆方二百里其食者四之一諸男之地封疆方百里其食者四之一凡造都鄙制其地域而封溝之以其室數制之不易之地家百畝一易之地家二百畝再易

之地家三百畝乃分地職奠地守制地貢而頒職事焉
以爲地灋而待政令

以荒政十有二聚萬民一曰散利二曰薄征三曰緩刑
四曰弛力五曰舍禁六曰去幾七曰青禮八曰殺哀九
曰蕃樂十曰多昏十有一曰索鬼神十有二曰除盜賊
以保息六養萬民一曰慈幼二曰養老三曰振窮四曰
恤貧五曰寬疾六曰安富

以本俗六安萬民一曰媾宮室二曰族墳墓三曰聯兄

第四曰聯師儒五曰聯朋友六曰同衣服

正月之吉始和布教于邦國都鄙乃縣教象之灋于象
魏使萬民觀教象挾日而歛之乃施教灋于邦國都鄙
使之各以教其所治民令五家爲比使之相保五比爲
閭使之相受四閭爲族使之相葬五族爲黨使之相救
五黨爲州使之相賙五州爲鄉使之相賓

頒職事十有二于邦國都鄙使以登萬民一曰稼穡二
曰樹藝三曰作材四曰阜蕃五曰飭材六曰通財七曰

化材八曰斂材九曰生材十曰學藝十有一曰世事十有二曰服事

登言進而成之九職任萬民加三事焉所以進而成之也

以鄉三物教萬民而賓興之一曰六德知仁聖義忠和二曰六行孝友睦婣任恤三曰六藝禮樂射御書數以鄉八刑糾萬民一曰不孝之刑二曰不睦之刑三曰不婣之刑四曰不第之刑五曰不任之刑六曰不恤之

刑七曰造言之刑八曰亂民之刑

以五禮防萬民之僞而教之中以六樂防萬民之情而教之和凡萬民之不服教而有獄訟者與有地治者聽而斷之其附于刑者歸于士

祀五帝奉牛牲羞其肆享先王亦如之大賓客令野修道委積大喪帥六鄉之衆庶屬其六引而治其政令大軍旅大田役以旗致萬民而治其徒庶之政令若國有大故則致萬民於王門令無節者不行於天下大荒大

札則令邦國移民通財舍禁弛力薄征緩刑

歲終則令教官正治而致事正歲令于教官曰各共爾職脩乃事以聽王命其有不正則國有常刑

小司徒之職掌建邦之教灋以稽國中及四郊都鄙之夫家九比之數以辨其貴賤老幼廢疾凡征役之施舍與其祭祀飲食喪紀之禁令

乃頒比灋于六鄉之大夫使各登其鄉之衆寡六畜車輦辨其物以歲時入其數以施政教行徵令

凡民數有數之者閭胥以時數其衆寡是也有稽之者鄉師以時稽其夫家衆寡是也數之則以所屬之人寡稽之則以其所屬之人衆有校而登之者族師以時屬民而校登其夫家衆寡是也有登而不校者鄉大夫以歲時登其夫家衆寡是也登之而不校則其登之也因族師之所校而已

及三年則大比大比則受邦國之比要乃會萬民之卒伍而用之五人爲伍五伍爲兩四兩爲卒五卒爲旅五

旅為師五師為軍以起軍旅以作田役以比追胥以令
貢賦

乃均土地以稽其人民而周知其數上地家七人可任
也者家三人中地家六人可任也者二家五人下地家
五人可任也者家二人凡起徒役毋過家一人以其餘
為羨唯田與追胥竭作

可任者或家三人二家五人家二人而起徒役無過
家一人盖用徒役不必一時皆徧計所役久近取勞

佚均而已不于一役家起二人所以寬民也惟田與追胥竭作則獵取禽獸與衆同欲逐伺盜賊與衆同惡所役近且不久故也

凡用衆庶則掌其政教與其戒禁聽其辭訟施其賞罰誅其犯命者凡國之大事致民大故致餘子

乃經土地而井牧其田野九夫爲井四井爲邑四邑爲丘四丘爲甸四甸爲縣四縣爲都以任地事而令貢賦凡稅歛之事

田畝有類於井而公田之中又鑿井焉故謂之井田
一井之田九百畝八家八百畝公田居中百畝除二
十畝八家分之得二畝半以爲廬舍合保城之地二
畝半孟子所謂五畝之宅是也公田八十畝八家耕
之是爲助法廬舍居中貴人也私田環列於公田之
外蓋衛王之意八家私百畝至於興兵之際乃八陣
圖之法

乃分地域而辨其守施其職而平其政

凡小祭祀奉牛牲羞其肆小賓客令野修道委積大軍
旅帥其衆庶小軍旅巡役治其政令大喪帥邦役治其
政教凡建邦國立其社稷正其畿疆之封凡民訟以地
比正之地訟以圖正之

歲終則攷其屬官之治成而誅賞令羣吏正要會而致
事正歲則帥其屬而觀教灋之象徇以木鐸曰不用灋
者國有常刑令羣吏憲禁令修灋糾職以待邦治及大
比六鄉四郊之吏平教治正政事攷夫屋及其衆寡六

畜兵器以待政令

鄉師之職各掌其所治鄉之教而聽其治以國比之灋以時稽其夫家衆寡辨其老幼貴賤廢疾馬牛之物辨其可任者與其施舍者掌其戒令糾禁聽其獄訟大役則帥民徒而至治其政令既役則受州里之役要以攷司空之辟以逆其役事凡邦事令作秩叙

大祭祀羞牛牲共茅蒞大軍旅會同正治其徒役與其輦輦戮其犯命者大喪用役則帥其民而至遂治之及

葬執纛以與匠師御匱而治役及窆執斧以泣匠師

葬而治役正其挽匱之行列故執纛以為儀已窆而
泣匠師則以防匱之傾虧使戒飭焉故執以為威

凡四時之田前期出田法于州里簡其鼓鐸旗物兵器
修其卒伍及期以司徒之大旗致衆庶而陳之以旗物
辨鄉邑而治其政令刑禁巡其前後之屯而戮其犯命
者斷其爭禽之訟凡四時之徵令有常者以木鐸徇於

市朝

市朝衆所聚之地使皆聞而知之也

以歲時巡國及野而賙萬民之糴阨以王命施惠歲終則攷六鄉之治以詔廢置

正歲稽其鄉器比共吉凶二服閭共祭器族共喪器黨共射器州共賓器鄉共吉凶禮樂之器若國大比則攷教察辭稽器展事以詔誅賞

鄉大夫之職各掌其鄉之政教禁令正月之吉受教灋于司徒退而頒之于其鄉吏使各以教其所治以攷其

德行察其道藝

攷攷知其實偽察察見其精粗

以歲時登其夫家之衆寡辨其可任者國中自七尺以
及六十野自六尺以及六十有五皆征之其舍者國中
貴者賢者能者服公事者老者疾者皆舍以歲時入其
書

征之者以其材舍之者以其齒

三年則大比攷其德行道藝而興賢者能者鄉老及鄉

大夫帥其吏與其衆寡以禮禮賓之厥明鄉老及鄉大夫羣吏獻賢能之書于王王再拜受之登於天府內史貳之退而以鄉射之禮五物詢衆庶一曰和二曰容三曰主皮四曰和容五曰興舞此謂使民興賢出使長之使民興能入使治之歲終則令六鄉之吏皆會政致事正歲令羣吏攷灋于司徒以退各憲之於其所治之國大詢于衆庶則各帥其鄉之衆寡而致於朝國有大故則令民各守其閭以待政令以旌節輔令則達之

帥其鄉之衆寡則鄉官咸在焉若州長則所帥衆若閭胥則所帥寡

州長各掌其州之教治政令之灋正月之吉各屬其州之民而讀灋以攷其德行道藝而勸之以糾其過惡而戒之若以歲時祭祀州社則屬其民而讀灋亦如之春秋以禮會民而射于州序凡州之大祭祀大喪皆蒞其事若國作民而師田行役之事則帥而致之掌其戒令與其賞罰歲終則會其州之政令正歲則讀教灋如初

三年大比則大攷州里以贊鄉大夫廢興

黨正各掌其黨之政令教治及四時之孟月吉日則屬民而讀邦灋以糾戒之春秋祭禋亦如之國索鬼神而祭祀則以禮屬民而飲酒于序以正齒位壹命齒于鄉里再命齒于父族三命而不齒凡其黨之祭祀喪紀昏冠飲酒教其禮事掌其戒禁凡作民而師田行役則以其灋治其政事歲終則會其黨政帥其吏而致事正歲屬民讀灋而書其德行道藝以歲時涖校比及大比亦

如之

族師各掌其族之戒令政事月吉則屬民而讀邦灋書
其孝弟睦姻有學者春秋祭酺亦如之以邦比之灋帥
四閭之吏以時屬民而校登其族之夫家衆寡辨其貴
賤老幼廢疾可任者及其六畜車輦五家為比十家為
聯五人為伍十人為聯四閭為族八閭為聯使之相保
相受刑罰慶賞相及相共以受邦職以役國事以相葬
埋若作民而師田行役則合其卒伍簡其兵器以鼓鐸

旗物帥而至掌其治令戒禁刑罰歲終則會政致事

以伍聯伍故謂之令

閭胥各掌其閭之徵令以歲時各數其閭之衆寡辨其
施舍凡春秋之祭祀役政喪紀之數聚衆庶既比則讀
灋書其敬敏任恤者凡事掌其比觥撻罰之事

比長各掌其比之治五家相受相和親有臯竒衰則相
及徙于國中及郊則從而授之若徙于他則為之旌節
而行之若無授無節則唯闕土內之

經於鄉大夫曰政教禁令州長曰教治政令黨正曰
政令教治族師曰戒令政事閭胥曰閭之徵令比長
曰比之治命官之意其輕重皆在一字間也政令為
重禁令次之戒令又次之徵令為下鄉大夫州長詳
於教而兼政黨正族師詳於政而兼教閭胥則承上
之政教而掌其政令耳比長則並無所為令矣

封人掌設王之社壝為畿封而樹之凡封國設其社稷
之壝封其四疆造都邑之封域者亦如之令社稷之職

凡祭祀飾其牛牲設其楅衡置其絳共其水橐歌舞牲
及毛炮之豚凡喪紀賓客軍旅大盟則飾其牛牲

封人言掌設王之社壝封疆而樹之則以飾土事為
職故使之飾牛牲以牛土畜故也

鼓人掌教六鼓四金之音聲以節聲樂以和軍旅以正
田役教為鼓而辨其聲用以雷鼓鼓神祀以靈鼓鼓社
祭以路鼓鼓鬼享以鼗鼓鼓軍事以鼙鼓鼓役事以晉
鼓鼓金奏以金鐃和鼓以金鐃節鼓以金鐃止鼓以金

鐸通鼓凡祭祀百物之神鼓兵舞帔舞者凡軍旅夜鼓
鑿軍動則鼓其衆田役亦如之救日月則詔王鼓大喪
則詔大僕鼓

舞師掌教兵舞帥而舞山川之祭祀教帔舞帥而舞社
稷之祭祀教羽舞帥而舞四方之祭祀教皇舞帥而舞
旱暵之事凡野舞則皆教之凡小祭祀則不興舞

牧人掌牧六牲而阜蕃其物以共祭祀之牲牷凡陽祀
用騂牲毛之陰祀用黝牲毛之望祀各以其方之色牲

毛之凡時祀之牲必用牲物凡外祭毀事用尢可也凡祭祀共其犧牲以授充人繫之凡牲不繫者共奉之

共奉之則非特共其牲又奉其事

牛人掌養國之公牛以待國之政令凡祭祀共其享牛求牛以授職人而芻之凡賓客之事共其牢禮積膳之牛饗食賓射共其膳羞之牛軍事共其犒牛喪事共其奠牛凡會同軍旅行役共其兵車之牛與其牽傍以載公任器凡祭祀共其牛牲之互與其盆簠以待事

充人掌繫祭祀之牲。牲，牲也。祀，五帝則繫于牢，芻之三月，享先王亦如之。凡散祭祀之牲，繫于國門，使養之。展牲則告，牲碩牲則贊。

載師掌任土之灋，以物地事，授地職而待其政令。以廛里任國中之地，以場圃任園地，以宅田士田賈田任近郊之地，以官田牛田賞田牧田任遠郊之地，以公邑之田任甸地，以家邑之田任稍地，以小都之田任縣地，以大都之田任甸地。凡任地，國宅無征，園廩二十而一，近

郊十一遠郊二十而三甸稍縣都皆無過十二唯其漆
林之征二十而五凡宅不毛者有里布凡田不耕者出
屋粟凡民無職事者出夫家之征以時徵其賦

閭師掌國中及四郊之人民六畜之數以任其力以待
其政令以時徵其賦凡任民任農以耕事貢九穀任圃
以樹事貢草木任工以飭材事貢器物任商以市事貢
貨賄任牧以畜事貢鳥獸任嬪以女事貢布帛任衡以
山事貢其物任虞以澤事貢其物凡無職者出夫布凡

庶民不畜者祭無牲不耕者祭無盛不樹者無槔不蠶者不帛不績者不衰

縣師掌邦國都鄙稍甸郊里之地域而辨其夫家人民田萊之數及其六畜車輦之稽三年大比則以攷羣吏而以詔廢置若將有軍旅會同田役之戒則受灋于司馬以作其衆庶及馬牛車輦會其車人之卒伍使皆備旗鼓兵器以帥而至凡造都邑量其地辨其物而制其域以歲時徵野之賦貢

遺人掌邦之委積以待施惠鄉里之委積以恤民之羸
阨門關之委積以養老孤郊里之委積以待賓客野鄙
之委積以待羈旅縣都之委積以待凶荒凡賓客會同
師役掌其道路之委積凡國野之道十里有廬廬有飲
食三十里有宿宿有路室路室有委五十里有市市有
候館候館有積凡委積之事巡而比之以時頒之

均人掌均地政均地守均地職均人民牛馬車輦之力
政凡均力政以歲上下豐年則公旬用三日焉中年則

公旬用二日焉無年則公旬用一日焉凶札則無力政
無財賦不收地守地職不均地政三年大比則大均
地政上所以正下地守地職下所以供上人民牛馬
車輦之力政則征于地守地職之人而已

師氏掌以媿詔王以三德教國子一曰至德以為道本
二曰敏德以為行本三曰孝德以知逆惡教三行一曰
孝行以親父母二曰友行以尊賢良三曰順行以事師
長居虎門之左司王朝掌國中失之事以教國子弟凡

國之貴遊子弟學焉凡祭祀賓客會同喪紀軍旅王舉則從聽治亦如之使其屬帥四夷之隸各以其兵服守王之門外且蹕朝在野外則守內列

師氏保氏凡祭祀賓客會同喪紀軍旅王舉則從聽治亦如之則是詔媿諫惡之官無適而非從夫然後王無一媿之弗為無一惡之弗去

保氏掌諫王惡而養國子以道乃教之六藝一曰五禮二曰六樂三曰五射四曰五馭五曰六書六曰九數乃

教之六儀一曰祭祀之容二曰賓客之容三曰朝廷之容四曰喪紀之容五曰軍旅之容六曰車馬之容

先王本道以達為藝緣道而制為儀

凡祭祀賓客會同喪紀軍旅王舉則從聽治亦如之使其屬守王闕

師氏未有媿而詔之故曰掌以媿詔王保氏有惡而後諫故曰掌諫王惡師氏保氏皆使其屬守則亦有保之名焉守事非其身之所任矣

司諫掌糾萬民之德而勸之朋友正其行而強之道藝
巡問而觀察之以時書其德行道藝辨其能而可任於
國事者以攷鄉里之治以詔廢置以行赦宥

知吏之實故可以詔廢置知民之實故可以行赦宥
司救掌萬民之衰惡過失而誅讓之以禮防禁而救之
凡民之有衰惡者三讓而罰三罰而士加明刑恥諸嘉
石役諸司空其有過失者三讓而罰三罰而歸于園土
凡歲時有天患民病則以節巡國中及郊野而以王命

施惠

調人掌司萬民之難而諧和之凡過而殺傷人者以民成之鳥獸亦如之凡和難父之讎辟諸海外兄弟之讎辟諸千里之外從父兄弟之讎不同國君之讎眡父師長之讎眡兄弟主友之讎眡從父兄弟弗辟則與之瑞節而以執之凡殺人有反殺者使邦國交讎之凡殺人而義者不同國令勿讎讎之則死凡有鬪怒者成之不可成者則書之先動者誅之

媒氏掌萬民之判凡男女自成名以上皆書年月日名
焉令男三十而娶女二十而嫁凡娶判妻入子者皆書
之中春之月令會男女於是時也奔者不禁若無故而
不辨令者罰之司男女之無夫家者而會之凡嫁子娶
妻入幣純帛無過五兩禁遷葬者與嫁殤者凡男女之
陰訟聽之于勝國之社其附于刑者歸之于士
社陰故于茲聽訟神所在也明當敬而不褻

欽定四庫全書

經部

周官新義卷七至十

詳校官監察御史_臣祝德麟

刑部郎中_臣許兆椿覆勘

膳錄舉人_臣楊炤

膳錄監生_臣徐元秀

欽定四庫全書

周官新義卷七

宋 王安石 撰

地官二

司市掌市之治教政刑量度禁令以次敘分地而經市以陳肆辨物而平市以政令禁物靡而均市以商賈阜貨而行布以量度成賈而徵儋以質劑結信而止訟以賈民禁偽而除詐以刑罰禁競而去盜以泉府同貨而斂賒

大市日昃而市百族爲主朝市朝時而市商賈爲主夕市夕時而市販夫販婦爲主

凡市入則胥執鞭度守門市之羣吏平肆展成奠賈上旌于思次以令市市師涖焉而聽大治大訟胥師賈師涖于介次而聽小治小訟

凡萬民之期于市者辟布者量度者刑戮者各於其地之敘凡得貨賄六畜者亦如之三日而舉之凡治市之貨賄六畜珍異亡者使有利者使阜害者使亡靡者使

微

凡通貨賄以璽節出入之國凶荒札喪則市無征而作
布凡市偽飾之禁在民者十有二在商者十有二在賈
者十有二在工者十有二市刑小刑憲罰中刑徇罰大
刑扑罰其附于刑者歸于士

國君過市則刑人赦夫人過市罰一幕世子過市罰一
帑命夫過市罰一蓋命婦過市罰一帷凡會同師役市
司帥賈師而從治其市政掌其賣債之事

過市非所以明遠利也市人犯刑以利而已國君近市則市人何誅焉故國君過市則刑人赦所謂刑人亦憲徇扑三者而已幕也帶也蓋也皆底下之物爲上近利則無以底下矣

質人掌成市之貨賄人民牛馬兵器珍異凡賣債者質劑焉大市以質小市以劑掌稽市之書契同其度量壹其淳制巡而攷之犯禁者舉而罰之凡治質劑者國中一旬郊二旬野三旬都三月邦國暮期內聽期外不聽

質劑之治宜以時決久而後辨則証逮或已死亡其事易以生僞故期外不聽亦所以省煩擾

廛人掌斂市歛布總布質布罰布廛布而入于泉府凡屠者斂其皮角筋骨入于玉府凡珍異之有滯者斂而入于膳府

皮角筋骨屠者之餘財也廛人斂而入于玉府明所取者非民之正利

胥師各掌其次之政令而平其貨賄憲刑禁焉察其詐

僞飾行債隱者而誅罰之聽其小治小訟而斷之

賈師各掌其次之貨賄之治辨其物而均平之展其成而奠其賈然後令市凡天患禁貴債者使有恆賈四時之珍異亦如之凡國之賣債各帥其屬而嗣掌其月凡師役會同亦如之

司競掌憲市之禁令禁其鬪嚙者與其競亂者出入相陵犯者以屬遊飲食于市者若不可禁則搏而戮之司稽掌巡市而察其犯禁者與其不物者而搏之掌執

市之盜賊以徇且刑之

胥各掌其所治之政執鞭度而巡其前掌其坐作出入之禁令襲其不正者凡有罪者撻戮而罰之

肆長各掌其肆之政令陳其貨賄名相近者相遠也實相近者相爾也而平正之斂其總布掌其戒禁

泉府掌以市之征布斂市之不售貨之滯於民用者以其賈買之物揭而書之以待不時而買者買者各從其抵都鄙從其主國人郊人從其有司然後予之凡賒者

祭祀無過旬日喪紀無過三月凡民之貸者與其有司辨而授之以國服爲之息凡國事之財用取具焉歲終則會其出入而納其餘

司門掌授管鍵以啓閉國門幾出入不物者正其貨賄凡財物犯禁者舉之以其財養死政之老與其孤

司門總統諸門故掌授管鍵之事

祭祀之牛牲繫焉監門養之凡歲時之門受其餘凡四方之賓客造焉則以告

司關掌國貨之節以聯門市司貨賄之出入者掌其治
禁與其征廛凡貨不出於關者舉其貨罰其人凡所達
貨賄者則以節傳出之國凶札則無關門之征猶幾凡
四方之賓客敏關則爲之告有外內之送令則以節傳
出內之

掌節掌守邦節而辨其用以輔王命守邦國者用玉節
守都鄙者用角節凡邦國之使節山國用虎節土國用
人節澤國用龍節皆金也以英蕩輔之門關用符節貨

賄用璽節道路用旌節皆有期以反節凡通達於天下者必有節以傳輔之無節者有幾則不達

門關則以符合之貨賄則以璽驗之道路則以旌表之

遂人掌邦之野以土地之圖經田野造縣鄙形體之濬五家爲鄰五鄰爲里四里爲鄣五鄣爲鄙五鄙爲縣五縣爲遂皆有地域溝樹之使各掌其政令刑禁

比相保則鄰亦相保閭相受則里亦相受族相葬則

鄮亦相葬矣黨相救則鄙亦相救矣州相賙則縣亦相賙矣鄉相賔則遂亦相賔矣

以歲時稽其人民而授之田野簡其兵器教之稼穡凡治野以下劑致阡以田里安阡以樂昏擾阡以土宜教阡稼穡以興耨利阡以時器勸阡以疆予任阡

孟子曰唯助爲有公田許慎釋鋤以商人七十而鋤則助鋤一也興之以助公田則阡得所私焉所以利之善其器則以勸謂之時器則器之用各有時若耜

以耕鉅以獲

以土均平政辨其野之土上地中地下地以頒田里上地夫一廛田百晦萊五十晦餘夫亦如之中地夫一廛田百晦萊百晦餘夫亦如之下地夫一廛田百晦萊二百晦餘夫亦如之

凡治野夫間有遂遂上有徑十夫有溝溝上有畛百夫有洫洫上有涂千夫有澮澮上有道萬夫有川川上有路以達于畿

以歲時登其夫家之衆寡及其六畜車輦辨其老幼廢疾與其施舍者以頒職作事以令貢賦以令師田以起政役

遂人既登其夫家衆寡六畜車輦遂師又以時登則遂師登之于遂人遂人登之于小司徒

若起野役則令各帥其所治之民而至以遂之大旗致之其不用命者誅之

鄉師致民以司徒之大旗遂人所謂大旗亦司徒之

大旗于是建焉于遂言遂之大旗則鄉可知于鄉言司徒之大旗則遂亦可知

凡國祭祀共野牲令野職凡賓客令脩野道而委積大喪帥六遂之役而致之掌其政令及葬帥而屬六綽及窆陳役凡事致野役而師田作野民帥而至掌其政治禁令

遂師各掌其遂之政令戒禁以時登其夫家之衆寡六畜車輦辨其施舍與其可任者經牧其田野辨其可食

者周知其數而任之以徵財征

經牧其田野猶小司徒所謂經土地而井牧其田野
不言井則以下言辨其可食者周知其數而任之故
也

作役事則聽其治訟巡其稼穡而移用其民以救其時
事

凡國祭祀審其誓戒共其野牲入野職野賦于王府賓
客則巡其道脩庀其委積大喪使帥其屬以幄帟先道

野役及窆抱磨共丘籠及蜃車之役軍旅田獵平野民掌其禁令比敘其事而賞罰

幕人大喪共帷幕帟綬今此幄帟非幕人所共矣道野役帥以至墓磨者適歷執紼者名也丘籠之役窆復土也其器曰籠蜃車柩路也柩路載柩四輪迫地而行有似于蜃因取名焉行至壙乃說更復載龍輶蜃車載闈壙之蜃者

遂大夫各掌其遂之政令以歲時稽其夫家之衆寡六

畜田野辨其可任者與其可施舍者以教稼穡以稽功
事掌其政令戒禁聽其治訟令爲邑者歲終則會政致
事正歲簡稼器脩稼政三歲大比則帥其吏而興眚明
其有功者屬其地治者凡爲邑者以四達戒其功事而
誅賞廢興之

縣正各掌其縣之政令徵比以頒田里以分職事掌其
治訟趨其稼事而賞罰之若將用野民師田行役移執
事則帥而至治其政令既役則稽功會事而誅賞

遂官各降鄉一等其官亦各降焉故州謂之長縣與黨同謂之正鄙與族同謂之師移執事若遂師所謂巡其稼穡而移用其民以救其時事也

鄙師各掌其鄙之政令祭祀凡作民則掌其戒令以時數其衆庶而察其媿惡而誅賞歲終則會其鄙之政而致事

鄼長各掌其鄼之政令以時校登其夫家比其衆寡以治其喪紀祭祀之事若作其民而用之則以旗鼓兵革

帥而至若歲時簡器與有司數之凡歲時之戒令皆聽之趨其耕耨稽其女功

里宰掌比其邑之衆寡與其六畜兵器治其政令以歲時合耦于耜以治稼穡趨其耕耨行其秩敘以待有司之政令而徵斂其財賦

鄰長掌相糾相受凡邑中之政相贊徙于他邑則從而授之

旅師掌聚野之耜粟屋粟間粟而用之以質劑致民平

頌其興積施其惠散其利而均其政令凡用粟春頌而秋斂之凡新甿之治皆聽之使無征役以地之嫩惡爲之等

掌聚野之耬粟屋粟間粟而用之者聚此三粟而用以頌以施以散也施其惠若民有艱阨不責其償

稍人掌令丘乘之政令若有會同師田行役之事則以縣師之灋作其同徒輦輦帥而以至治其政令以聽於司馬大喪帥蜃車與其役以至掌其政令以聽於司徒

丘之政令司徒所掌乘之政令司馬所掌稍人掌令
丘乘之政令耳丘言其地乘言其賦所謂同則丘地
也所謂徒役輦輦蜃車則乘賦也其作而帥以至掌
其政令以聽于司馬司徒則所謂令丘乘之政令也
委人掌斂野之賦斂薪芻凡疏材木材凡畜聚之物以
稍聚待賓客以甸聚待羈旅凡其余聚以待頒賜

稍聚者所聚稍給之物甸聚者所聚甸賦之物余聚
者所聚經用之餘物頒則用財之餘事故以余聚待

之

以式灋共祭祀之薪蒸木材賓客共其芻薪喪紀共其薪蒸木材軍旅共其委積薪芻凡疏材共野委兵器與其野圉財用凡軍旅之賓客館焉

土均掌平土地之政以均地守以均地事以均地貢均人無所不均故曰均地政土均雖有及乎地征然以土爲主未及乎均人故言平土地之政

以和邦國都鄙之政令刑禁與其施舍禮俗喪紀祭祀

皆以地嫩惡爲輕重之灋而行之掌其禁令

草人掌土化之灋以物地相其宜而爲之種凡糞種駢剛用牛赤緹用羊墳壤用麋渴澤用鹿鹹渴用貍勃壤用狐埴壚用豕彊槩用蕢輕輿用犬

稻人掌稼下地以瀦畜水以防止水以溝蕩水以遂均水以列舍水以澮寫水以涉揚其芟作田凡稼澤夏以水殄草而芟夷之澤草所生種之芒種旱暵共其雩斂喪紀共其葦事

夏以水殄草則以夏水如湯利以殺草也喪紀共其
葦事葦生下地故也

土訓掌道地圖以詔地事道地隱以辨地物而原其生
以詔地求王巡守則夾王車

誦訓掌道方志以詔觀事掌道方隱以詔辟忌以知地
俗王巡守則夾王車

山虞掌山林之政令物爲之厲而爲之守禁仲冬斬陽
木仲夏斬陰木凡服耜斬季材以時入之令萬民時斬

材有期日凡邦工入山林而掄材不禁春秋之斬木不入禁凡竊木者有刑罰

考工記曰凡斬穀之道必矩其陰陽陽也者縝理而堅陰也者䟽理而柔是故以火養其陰而齊諸其陽則穀雖敝不敝所謂陽木則縝理而堅者也所謂陰木則䟽理而柔者也䟽理而柔宜以火養則斬以仲夏使盛陽暴之與火養同意陰木如此則陽木斬以仲冬宜矣

若祭山林則爲主而脩除且蹕若大田獵則萊山田之野及弊田植虞旗于中致禽而珥焉

蹕止人犯其祭虞主山林掌其政令且爲之厲禁也林衡掌巡林麓之禁令而平其守以時計林麓而賞罰之若斬木材則受灋于山虞而掌其政令

澤虞言使其地之人守其財物而林衡不言林衡言平其守而澤虞不言互見也林之政山虞掌之川衡掌其巡之禁令而已然則林衡正於山虞者也川衡

正於澤虞者也

川衡掌巡川澤之禁令而平其守以時舍其守犯禁者
執而誅罰之祭祀賓客共川奠

澤亦必如此而不言亦互見也

澤虞掌國澤之政令爲之厲禁使其地之人守其財物
以時入之于王府頒其餘于萬民凡祭祀賓客共澤物
之奠喪紀共其葦蒲之事

使其地之人守其財物則人自爲守所以澤雖大莫

或害其養蕃山林川澤皆有財物惟澤入于王府者
澤物最小也所以自養取薄所以養人從厚夫是之
謂王德又頒其餘于萬民則雖澤物亦不盡利

若大田獵則萊澤野及弊田植虞旌以屬禽

澤野所謂藪也

迹人掌邦田之地政爲之屬禁而守之凡田獵者受令
焉禁麇卵者與其毒矢射者

名曰迹人以迹知禽獸之處而後可得田而取矣邦

田無地則鳥獸無所生有地而無政則其生不能蕃
息雖有政不爲厲禁以守之則侵地盜物所以干有
司者衆矣雖爲厲禁以守之然雉兔者往焉亦弗禁
也

卅人掌金玉錫石之地而爲之厲禁以守之若以時取
之則物其地圖而授之巡其禁令

角人掌以時徵齒角凡骨物於山澤之農以當邦賦之
政令以度量受之以共財用

羽人掌以時徵羽翮之政于山澤之農以當邦賦之政
令凡受羽十羽爲審百羽爲搏十搏爲縛

掌葛掌以時徵絺綌之材于山農凡葛征徵草貢之材
于澤農以當邦賦之政令以權度受之

掌染草掌以春秋斂染草之物以權量受之以待時而
頒之

掌炭掌灰物炭物之徵令以時入之以權量受之以共
邦之用凡炭灰之事

掌染草至掌蜃所徵亦必當邦賦之政令而不言者則以角人羽人掌葛見之

掌荼掌以時聚荼以共喪事徵野疏材之物以待邦事凡畜聚之物

掌蜃掌斂互物蜃物以共闔壙之蜃祭祀共蜃器之蜃共白盛之蜃

用蜃以禦濕除狸蟲

圓人掌圓游之獸禁牧百獸祭祀喪紀賓客共其生獸

死獸之物

獸人共生獸死獸圉人共生獸死獸之物者獸人所
共田獵所畧圉人所共圉游所牧共其物若麋麋熊
蹠之類

場人掌國之場圃而樹之果蓏珍異之物以時斂而藏
之凡祭祀賓客共其果蓏享亦如之

廩人掌九穀之數以待國之匪頒賙賜稍食以歲之上
下數邦用以知足否以詔穀用以治年之凶豐凡萬民

之食食者人四鬴上也人三鬴中也人二鬴下也

民之食可以鬴計者校登夫家貴賤老幼廢疾之數
觀稼省斂稽比財物其法詳也

若食不能人二鬴則令邦移民就穀詔王殺邦用凡邦
有會同師役之事則治其糧與其食大祭祀則共其接
盛

舍人掌平宮中之政分其財守以灋掌其出入凡祭祀
共簠簋實之陳之賓客亦如之共其禮車米管米芻禾

喪紀共飯米熬穀以歲時縣種陸之種以共王后之春
獻種掌米粟之出入辨其物歲終則會計其政

倉人掌粟入之藏辨九穀之物以待邦用若穀不足則
止餘灋用有餘則藏之以待凶而頒之凡國之大事共
道路之穀積食飲之具

法式所用有雖不足不可以已者有待有餘然後用
者所謂餘法用則待有餘而後用者

司祿

闕

司稼掌巡邦野之稼而辨種槁之種周知其名與其所
宜地以爲灋而縣于邑閭巡野觀稼以年之上下出斂
灋掌均萬民之食而調其急而平其興

舂人掌共米物祭祀共其齎盛之米賓客共其牢禮之
米凡饗食共其食米掌凡米事

饔人掌凡祭祀共盛共王及后之六食凡賓客共其簋
簋之實饗食亦如之

舂人舂穀以爲米饔人炊米以爲食其職事相成故

春人祭祀共盥盛之米饍人祭祀共盛春人賓客共
牢禮之米而饍人共其簠簋之實饍人共王及后之
六食饗殮亦共簠簋之實而春人不言共米則以言
祭祀賓客從可知也

槁人掌共外內朝宐食者之食若饗耆老孤子士庶子
共其食掌黍祭祀之犬

欽定四庫全書

周官新義卷八

宋 王安石 撰

春官一

惟王建國辨方正位體國經野設官分職以為民極乃
立春官宗伯使帥其屬而掌邦禮以佐王和邦國禮官
之屬大宗伯卿一人小宗伯中大夫二人肆師下大夫
四人上士八人中士十有六人旅下士三十有二人府
六人史十有二人胥十有二人徒百有二十人

凡有族則有祀祀則有宗宗典祀者也宗伯掌天神人鬼地示之禮故謂之宗在四時之官為長故謂之

伯

鬱人下士二人府二人史一人徒八人

鬯人下士二人府一人史一人徒八人

雞人下士一人史一人徒四人

司尊彝下士二人府四人史二人胥二人徒二十人

司几筵下士二人府二人史一人徒八人

天府上士一人中士二人府四人史二人胥二人徒二十人

典瑞中士二人府二人史二人胥一人徒十人

典命中士二人府二人史二人胥一人徒十人

司服中士二人府二人史一人胥一人徒十人

典祀中士二人下士四人府二人史二人胥四人徒四十人

守祧奄八人女祧每廟二人奚四人

守廟祧而名之曰守祧守祧則廟可知矣

世婦每宮卿二人下大夫四人中士八人女府二人女史二人奚十有六人

內宗凡內女之有爵者

外宗凡外女之有爵者

冢人下大夫二人中士四人府二人史四人胥十有二人徒百有二十人

墓大夫下大夫二人中士四人府二人史四人胥二十

人徒二百人

職喪上士二人中士四人下士八人府二人史四人胥四人徒四十人

大司樂中大夫二人樂師下大夫四人上士八人下士十有六人府四人史八人胥八人徒八十人

大胥中士四人小胥下士八人府二人史四人徒四十人

大師下大夫二人小師上士四人瞽矇上瞽四十人中

瞽百人下瞽百有六十人眡瞭三百人府四人史八人胥十有二人徒百有二十人

典同中士二人府一人史一人胥二人徒二十人

典律同而名之曰典同典同則律可知矣

磬師中士四人下士八人府四人史二人胥四人徒四十人

鐘師中士四人下士八人府二人史二人胥六人徒六十人

笙師中士二人下士四人府二人史二人胥一人徒十人

搏師中士二人下士四人府二人史二人胥二人徒二十人

韎師下士二人府一人史一人舞者十有六人徒四十人

旄人下士四人舞者衆寡無數府二人史二人胥二人徒二十人

簫師中士四人府二人史二人胥二人徒二十人

簫章中士二人下士四人府一人史一人胥二人徒二

十人

鞀鞀氏下士四人府一人史一人胥二人徒二十人

典庸器下士四人府四人史二人胥八人徒八十人

征伐所得之器而謂之庸器者庸民功也則征伐之

功凡以為民非利其器故也

司千下士二人府二人史二人徒二十人

大卜下大夫二人卜師上士四人卜人中士八人下士十有六人府二人史二人胥四人徒四十人

大卜以下大夫為之而其官屬甚衆蓋先王重其事故也大卜掌其法龜人辨其名物體色攻之取之以其時上春則釁之而祭祀先卜及其卜也卜師又辨其左右上下陰陽授命龜者而詔相之其熟燂以明火其占也君占體大夫占色史占墨卜人占圻既事則繫幣以比其命歲終則計其占之中否先王用卜

如此故卜可恃以知吉凶夫木之有火明矣不致一
以鑽之則不出龜亦何異於此

龜人中士二人府二人史二人工四人胥四人徒四十
人

董氏下士二人史一人徒八人

占人下士八人府一人史二人徒八人

簪人中士二人府一人史二人徒四人

占夢中士二人史二人徒四人

眠祲中士二人史二人徒四人

大祝下大夫二人上士四人小祝中士八人下士十有六人府二人史四人胥四人徒四十人

喪祝上士二人中士四人下士八人府二人史二人胥四人徒四十人

甸祝下士二人府一人史一人徒四人

詛祝下士二人府一人史一人徒四人

司巫中士二人府一人史一人胥一人徒十人

男巫無數女巫無數其師中士四人府二人史四人胥四人徒四十人

神降之然後在男曰巫在女曰覲故不豫為員數

太史下大夫二人上士四人小史中士八人下士十有六人府四人史八人胥四人徒四十人

馮相氏中士二人下士四人府二人史四人徒八人

保章氏中士二人下士四人府二人史四人徒八人

內史中大夫一人下大夫二人上士四人中士八人下

士十有六人府四人史八人胥四人徒四十人

外史上士四人中士八人下士十有六人胥二人徒二十人

御史中士八人下士十有六人其史百有二十人府四人胥四人徒四十人

巾車下大夫二人上士四人中士八人下士十有六人府四人史八人工百人胥五人徒五十人

典路中士二人下士四人府二人史二人胥二人徒二

十人

車僕中士二人下士二人府二人史二人胥二人徒二
十人

司常中士二人下士四人府二人史二人胥四人徒四
十人

都宗人上士二人中士四人府二人史四人胥四人徒
四十人

家宗人如都宗人之數

凡以神士者無數以其藝為之貴賤之等

大宗伯之職掌建邦之天神人鬼地示之禮以佐王建保邦國

大宗伯之禮或以神鬼示為序或以鬼神示為序或以神示鬼為序以神鬼示為序定上下也以鬼神示為序辨內外也以神示鬼為序明尊卑也定上下然後辨內外辨內外然後明尊卑禮之序也

以吉禮事邦國之鬼神示以禋祀祀昊天上帝以實柴

祀日月星辰以禋燎祀司中司命觀師雨師以血祭祭社稷五祀五嶽以貍沈祭山林川澤以醯辜祭四方百物以肆獻裸享先王以饋食享先王以祠春享先王以禴夏享先王以嘗秋享先王以烝冬享先王

謂之建邦之天神人鬼地示之禮則禮當自王出故也謂之事邦國之鬼神示則其所事非特王國而已禋者意之精也無事於氣矣血者物之幽也無事於形矣實柴燀燎用氣而已貍沈醯辜則用形焉氣親

上形親下則各從其類也柴而實牲然後禋燎天祀之所同也或言實柴或言禋燎則相備而已相備而言實柴於上言禋燎於下以先後為尊卑也山林之受物也以狸川澤之受物也以沈以狸沈祭焉則各以其物宜也四方異體肆而不全百物異用制而不變以醢辜祭焉則亦各以其物宜也天祀用物氣而貴精地祭用物形而貴幽鬼享用人義而貴時羞其肆而酌獻焉則以裸享先王其裸也猶事生之有饗

也羞其熟而饋食焉則以食享先王其食也猶事生之有食也饗以陽為主故禘以夏食以陰為主故祫以冬春物生未有以享也其享也以詞為主故春曰祠夏則陽盛矣其享也以樂為主故夏曰禴秋物成可嘗矣其享也嘗而已故秋曰嘗冬則物衆其享也烝衆物焉故冬曰烝冬辨於物之時而以冬祫者惟辨於物然後與其合故也郊血郊特牲則天祀非無血非不用形王賓殺禋蕭合黍稷臭陽達於墻屋則

鬼享非無禋非不用氣然則祀也祭也享也各有所
主而已祀有昊天而無五帝有司中司命而無司民
司祿祭有社稷而無大示有五嶽而無四瀆有山林
川澤而無丘陵墳衍享有先王而無先公與大烝之
所祭者則祀典所秩於此不可勝言也上下比義從
可知而已

以凶禮哀邦國之憂以喪禮哀死亡以荒禮哀凶札以
弔禮哀禍哉以禴禮哀圍敗以恤禮哀寇亂

喪禮荒禮以彼喪荒哀之也弔禮禴禮恤禮以我弔
禴恤哀之也哭亡謂之喪死亡斯哭之矣又亡而草
生之謂之荒凶札斯荒矣禮記曰反而亡焉失之矣
於是為甚始死也哀其死既葬矣則哀其亡焉弔以
慰之禴以補之恤以救之寇亂則及事時故救之圍
敗則在事後故補之而已死亡凶札禍哉天事也死
亡為重凶札次之禍哉為輕圍敗寇亂人事也圍敗
為重寇亂為輕此凶禮之序也

以賓禮親邦國春見曰朝夏見曰宗秋見曰覲冬見曰
遇時見曰會殷見曰同時聘曰問殷覲曰視

以歲譬日則春朝時也故春見曰朝夏則萬物相見
於是時也有為之宗也者故夏見曰宗秋非萬物相
見之時於是見焉可謂勤矣故秋見曰覲冬則物辨
矣莫為之宗亦莫之宗其見也若邂逅然故冬見曰
遇時見曰會者將命以事召而會之有時而然故曰
時會殷見曰同者王不巡狩會而見之殷國所同故

曰殷同時聘以恩問之而已故時聘曰問殷覲以事有所察治故殷覲曰視凡此諸禮或大或小或如常禮惟其時物故或言大或言小或不言大小

以軍禮同邦國大師之禮用衆也大均之禮恤衆也大田之禮簡衆也大役之禮任衆也大封之禮合衆也

用衆用其命恤衆恤其事簡衆簡其能任衆任其力合衆合其志地有定域民有常主則所以合其志也用其命而不知恤其事恤其事而不知簡其能簡其

能而不知任其力任其力而不知合其志非所以為
軍禮軍禮以用其命為主以合其志為終始

以嘉禮親萬民以飲食之禮親宗族兄弟以昏冠之禮
親成男女以賓射之禮親故舊朋友以饗燕之禮親四
方之賓客以脤膾之禮親兄弟之國以賀慶之禮親異
姓之國

以飲食之禮親宗族兄弟者宗族兄弟飲食之而已
致其愛故也四方之賓客則有饗燕之禮焉致其敬

故也昏冠之禮親成男女者昏以親之冠以成之冠以成之者男也而曰親成男女則男帥女而成之也成男也乃亦所以成女先昏後冠則親之而後成之以脈膾之禮親兄弟之國者與之同福祿也異姓之國則不與同福祿矣故以賀慶之禮親之親宗族兄弟然後親成男女以尊及卑也親故舊朋友然後親四方之賓客以近及遠也四方之賓客以禮來接我者也兄弟異姓之國則我以禮往加焉此嘉禮之序

也

以九儀之命正邦國之位壹命受職再命受服三命受
位四命受器五命賜則六命賜官七命賜國八命作牧
九命作伯

以玉作六瑞以等邦國王執鎮圭公執桓圭侯執信圭
伯執躬圭子執穀璧男執蒲璧

以禽作六摯以等諸臣孤執皮帛卿執羔大夫執鴈士
執雉庶人執鵠工商執雞

其道足以衣被人而飾之以炳蔚之文章者孤之事也故孤執皮帛羣而不黨致恭而有禮者卿之事也故卿執羔進不失其時行不失其序者大夫之事也故大夫執鴈交有時別有倫守死而不犯分而被文以相質者士之事也故士執雉可畜而不散遷者庶人之事也故庶人執鵲可畜而不違時者工商之事也故工商執雞飾羔鴈者以績則卿大夫宜亦能衣被人而有文章故也

以玉作六器以禮天地四方以蒼璧禮天以黃琮禮地以青圭禮東方以赤璋禮南方以白琥禮西方以玄璜禮北方皆有牲幣各放其器之色

天之色蒼則其始事之時地之色黃則其終功之時
璧辟也萬物親地而天為之辟琮宗也萬物祖天而
地為之宗以蒼璧禮天則天以始事為功以黃琮禮
地則地以終功為事赤陽之盛色章陰之成事赤璋
者以陽之盛色物之以陰之成事名之玄陽之正色

黃陰之盛色玄璜者以陽之正色物之以陰之盛色
名之南北者陰陽之雜故也青圭則象陽之生而已
白琥則象陰之殺而已東西陰陽之純故也以其陽
之純故成象焉以其陰之純故效法焉南陽也陰居
其半故半圭而已北陰也陽居其半故半璧而已皆
有牲幣各放其器之色則亦各從其類也

以天產作陰德以中禮防之以地產作陽德以和樂淫
之以禮樂合天地之化百物之產以事鬼神以諧萬民

以致百物

天產養精故以作陰德陰德所以行陰禮者也以中
禮防之則使其不淫地產養形故以作陽德陽德所
以行陽禮者也以和樂防之則使其不怠天地之化
是謂大和百物之產則亦天地之和而已中禮和樂
所以合之合而與天地同流然後可以事鬼神諧萬
民致百物

凡祀大神享大鬼祭大示帥執事而卜日宿眡滌濯泣

王鬯省牲鑊奉玉盥詔大號治其大禮詔相王之大禮
若王不與祭祀則攝位凡大祭祀王后不與則攝而薦
豆籩徹大賓客則攝而載果

大賓客攝而載果者亦王后不與而攝也

朝覲會同則為上相大喪亦如之王哭諸侯亦如之王
命諸侯則儗國有大故則旅上帝及四望

相相王儗儗諸侯

王大封則先告后土乃頒祀於邦國都家鄉邑

王大封則先告后土乃頒祀於都家鄉邑者建邦國而封之所謂大封其頒祀則及其都家與其鄉邑蓋諸侯之卿與其子弟所食采亦謂之都書所謂簡恤爾都左氏傳所謂邑有先君之主曰都是也言告后土則告於社可知后土配食於社者也不告稷則大封土事稷無豫焉禮之道施報而已以吉禮事邦國之鬼神示則施報之大者以凶禮哀邦國之憂則施報之急者能務施報以主天下之平則能賓諸侯一

天下有不帥也軍禮於是乎用矣無敢不帥然後人得各保其常居而嘉禮行焉此五禮之序也禮之行有以賢治不肖有以貴治賤正之以九儀則尚賢以治不肖貴貴以治賤也等之以六瑞則又各使之上同等之以六摯則又各使之自致人各上同而自致則禮出於一而上下治外作器以通神明之德內作德以正性命之情禮之道於是為至禮至矣則樂生焉以禮樂合天地之化百物之產則宗伯之事於是

為至夫然後可以相王之大禮而攝其事贊王之大
事而頒其政

小宗伯之職掌建國之神位右社稷左宗廟兆五帝於
四郊四望四類亦如之兆山川丘陵墳衍各因其方掌
五禮之禁令與其用等辨廟祧之昭穆辨吉凶之五服
車旗宮室之禁掌三族之別以辨親疏其正室皆謂之
門子掌其政令毛六牲辨其名物而頒之於五官使共
奉之辨六齎之名物與其用使六官之人共奉之辨六

彝之名物以待果將辨六尊之名物以待祭祀賓客掌衣服車旗宮室之賞賜掌四時祭祀之序事與其禮若國大貞則奉玉帛以詔號大祭祀省牲眡滌濯祭之日逆盥省鑊告時於王告備於王凡祭祀賓客以時將瓊果詔相祭祀之小禮凡大禮佐大宗伯賜卿大夫士爵則儉小祭祀掌事如大宗伯之禮大賓客受其將幣之齋若大師則帥有司而立軍社奉主車若軍將有事則與祭有司將事於四望若大甸則帥有司而饁獸於郊

遂頒禽大裁及執事禱祠於上下神示王崩大肆以柩
鬯潁及執事泣大歛小歛帥異族而佐縣衰冠之式于
路門之外及執事眡葬獻器遂哭之卜葬兆甫窆亦如
之既葬詔相喪葬之禮成葬而祭墓為位凡王之會同
軍旅甸役之禱祠肄儀為位國有禍裁則亦如之凡天
地之大裁類社稷宗廟則為位凡國之大禮佐大宗伯
凡小禮掌事如大宗伯之儀

右陰也地道之所尊故右社稷左陽也人道之所鄉

故左宗廟位宗廟於人道之所鄉則不死其親之意
兆五帝於四郊尊之也兆山川丘陵墳衍各因其方
賓之也以尊而遠之也知宗廟之為親以賓而外之
也知社稷之為主各於其郊各因其方則猶鬼神示
之居以方類也辨廟祧之昭穆者昭以祭下為義穆
以敬上為義正室謂之門子者以其當室故謂之正
室以其當門故謂之門子毛六牲辨其名物而頒之
於五官使共奉之者六牲天產故也辨六齋之名物

使六宮之人共奉之者六齋地產故也辨六彛之名物以待裸將辨六尊之名物以待祭祀賓客者尊彛皆以待祭祀賓客於彛言裸將於尊言祭祀賓客相備而已言彛裸將則尊酌獻可知也尊酌以獻居其所而爵者從之故謂之尊彛酌以裸求諸陰而已陰有常而無變故謂之彛罍人先尊後彛彛卑而尊尊故也今此先彛者以言其用用則先彛矣若國大貞則奉玉帛以詔號者大貞卜大事而貞之貞與書所

謂我二人共貞同義饁獸於郊者還舍於郊以獸饁
田衆也言獸則饁衆宜用大焉小宗伯之職始於建
社稷宗廟諸神之祀節莫差於僭僭莫重於祀故以
季氏而旅於泰山孔子病之掌五禮之禁令與其用
等則以防僭故也用等之不同有尊卑焉於是乎辨
廟祧之昭穆有貴賤焉於是乎辨五服車旗宮室之
禁有親疏焉於是乎掌三族之別以辨親疏尊卑貴
賤親疏分守以明然後人得保其祭祀祭祀有宗所

謂門子是也於是乎掌門子之政令門子以族得民者也得其門子斯得其民矣得其民然後王之禮有與其物奉其事於是乎辨牲齎尊彝之名物以待祭祀賓客上有以共其物奉其事則下亦宜有焉於是乎掌衣服車旗宮室之賞賜上下皆有以共其物奉其事則以時秩其事用其禮而已於是掌四時祭祀之序事與其禮用其禮則亦有序事矣既建社稷宗廟諸神之祀於是乎詔號既辨六牲之名物於是

乎省牲既辨六齎之名物於是乎逆齎若夫滌濯省
鑊告時告備則各附其事時言之而已既辨六尊六
彝之名物於是乎將瓚果若夫爵之事則有宰尸之
故不列於此既掌四時祭祀之序事與其禮於是乎
詔相大祭祀之小禮凡大事佐大宗伯小祭祀掌事
如大宗伯之禮既掌衣服車旗宮室之賞賜於是乎
王爵卿大夫則儼儼列於小祭祀掌事之上則小祭
祀之禮畀於爵卿大夫故也既待賓客以六彝以時

將瓚果於是乎受大賓客將幣之齋禮之道務施報而已受將幣之齋則邦國享王而施報之禮成矣大師大甸大裁之禮則以待變事而已大肆歛葬喪祭之禮則以待終事而已夫禮以事天地鬼神建保邦國防害弭災為終始故以禱祠及類肆儀為位終焉又曰九國之大禮佐大宗伯小事掌禮如大宗伯之儀則事多故矣禮多儀矣惟其時物也小宗伯之禮事不盡於上所言故凡以該之

